


顧亭林詩集彙注

下



顧亭之詩集卷之二



〔清〕顧炎武 著  
王蘧常 輯注  
吳不績 標校

顧亭林詩集彙注  
下

上海世紀出版股份有限公司  
上海古籍出版社

# 顧亭林詩集彙注卷四

王蘧常  
輯注  
吳丕績  
標校

再謁天壽山十三陵 已下上章困敦

【解題】

徐注：順治十七年庚子。張譜：十七年二月，至昌平，再謁天壽山。冒云：先生是年年四十八。

蘧常案：徐注本無「十三」兩字。是年明永曆十四年，公元一六六零年。

諸陵何崔嵬！不改蒼然色。下蟠厚地深，上峻青天極。佳氣鬱葱葱，靈長詎可測。云何宮闕旁，坐見獯戎逼？空勞性醴陳，微冀神豈食。仁言人所欣，甘言人所惑。小修此陵園，大屑我社稷。竭來復仲春，再拜翦荆棘。臣子分則同，駿奔乃其職。區區大馬心，媿乏匡扶力。

【彙校】

【題】潘刻本、徐注本無「十三」兩字。【宮闕旁】潘刻本、徐注本作「月游路」。

【獯戎】潘刻本、徐注本作「塞塵」；孫校本作「獯東」，韻目代字也。【微冀句】汪校云：「微

冀」應作「非類」。潘刻本「豈」作「□」；徐注本、曹校本作「祇」。丕績案：蓋臆改。【甘言】

孫校本「甘」作「盜」。

〔大屑句〕汪校云：「屑」應作「竊」，或「滅」。丕續案：亦韻目代字也。

潘刻本「社稷」作「□□」。

〔乃其〕潘刻本、徐注本作「誰共」。

【彙注】

〔二〕上峻句 徐注：詩：峻極于天。

〔三〕佳氣句 徐注：論衡吉驗篇：望氣者蘇伯阿爲王莽使，至南陽，遙望見舂陵城郭，喟曰：氣佳哉，

鬱鬱葱葱然！

〔三〕靈長 遵常案：晉書王敦傳論：賴嗣君英略，晉祚靈長。

〔四〕獵戎 遵常案：孟子梁惠王篇：大王事獵騫。史記五帝本紀：北逐葷粥。索隱：唐、虞以上曰山

戎，亦曰熏粥。

〔五〕空勞二句 徐注：晉書江道傳：有赤黍之盛而無牲醴之奠。汪云：「微實」，應作「非類」。

遵常案：「非類」作「微實」，韻目代字也。此亦潘鈔改之未盡者。仍之。左傳僖公十年：狐突

曰：神不歆非類。清世祖實錄：順治十六年十一月壬申，上駐蹕昌平州。是日，上道經明崇禎帝

陵，悽然泣下，酌酒陵前。癸酉，上閱明帝諸陵。甲戌，遣內大臣索尼祭明崇禎帝，文曰：惟帝重

聰御極，孜孜以康阜兆民爲念，十七年訪愆無數。不意流寇猖獗，國遂以傾，身殉社稷。倘使遭

際景運，可稱懿辟；乃續承衰緒，適丁劫厄。雖勵精圖治，而傾廈莫支，朕念及此，恆用深

惻。前巡畿輔，偶過昌平，睇望陵寢，益爲慘然。特備牲帛酒果，用昭禮祭。尙鑒！

(六) 甘言句 徐注：戰國策：商君曰：苦言，藥也；甘言，疾也。

(七) 小修句 遼常案：清史稿世祖本紀：十六年十一月甲戌，遣官祭明帝諸陵，並增陵戶，加修葺，禁樵採。後漢書郎顗傳：園陵至重，聖神攸憑。

(八) 大屑句 汪云：「屑」當作「竊」，或作「滅」。

遼常案：「屑」當代「竊」字，此亦韻目代字之改而未盡者。

(九) 竭來 見卷三張隱君元明園中置一小石龜曰仙隱祠徵詩紀之詩「竭來」注。

(十) 駿奔 遼常案：詩周頌清廟：駿奔走在廟。爾雅釋詁：駿，速也。

(十一) 區區句 徐注：史記三王世家：臣竊不勝犬馬心。李注：李陵答蘇武書：區區之心，竊慕此耳。

遼常案：左傳襄公十七年：宋國區區。

(十二) 匡扶 徐注：國語：匡困資無。注：匡，扶也。

## 送王文學麗正歸新安

### 【解題】

徐注：王文學麗正未詳。

遼常案：史記儒林列傳序：爲博士官置弟子五十人。郡國縣道邑有好文學，敬長上，肅政教，順鄉

里者，令相長丞上屬所二千石，謹察可者，詣太常，得受業如弟子。一歲皆輒試，能通一藝以上，補文學、掌故缺。後世因稱諸生爲文學矣。新安，縣名。河北、河南、浙江、安徽、廣東各省皆有之，此似謂今安徽之歙縣，古新安郡之郡治也。明歙縣屬徽州府，領於南京。明史志地理一徽州府歙注：西北有黃山，新安江出焉。王麗正曾在金聲幕，聲保績溪，黃山以抗清，一時池、寧、徽諸府人多應之，詳下，麗正疑亦爲於此時入幕之人。

兩年相遇都門道，只有王生是故人。原廟松楸頻眺望〔二〕，夾城花萼屢經巡〔三〕。悲歌絕塞將歸客，學劍空山未老身〔四〕。生舊在金侍郎聲幕府。賞得一杯燕市酒〔四〕，傾來和淚溼車輪〔五〕。

【彙校】

〔學劍句〕 句下自注：徐注本移題下。

【彙注】

〔二〕 原廟 遜常案：見卷二恭謁孝陵詩「衣冠」二句注。

〔三〕 夾城句 徐注：杜甫秋興詩：「花萼夾城通御氣。」

遜常案：唐會要：開元二十六年，廣花萼樓，築夾城，入芙蓉園。

〔四〕 學劍句 徐注：史記項羽本紀：「學書不成，去，學劍。」明史金聲傳：「聲，字正希，休寧人。十六年

冬，廷臣交薦，即命召用，促入都陛見，未赴而京師陷。福王立於南京，超擢聲左僉都御史。聲堅不起。清兵破南京，列郡望風迎降，聲糾集士民保績溪、黃山，分兵扼六嶺。寧國、丘祖德、徽

州溫璜、貴池吳應箕等多應之，乃遣使通表唐王，授聲右都御史兼兵部右侍郎，總督諸道軍。拔旌德、寧國諸縣。九月下旬，徽故御史黃澍降於清，王師間道襲破之。聲被執至江寧，語門人江天一曰：子有老母，不可死。對曰：天一同公起兵，可不同公殉義乎？遂偕死。

〔三〕燕市酒 徐注：史記刺客列傳：荆軻嗜酒，日與狗屠及高漸離飲於燕市。

〔四〕傾來句 徐注：古詩：腸中車輪轉。

遷常案：此謂送別將行，傾其酒與淚溼車輪也。

## 答徐甥乾學

【解題】

徐注：張譜：崇禎三年，先生第五妹歸同邑太僕少卿徐君應聘之孫開法。注：開法字念茲，號坦齋，恩貢生。次年，甥徐乾學生。

遷常案：清史稿徐乾學傳：字原一，江南崑山人。康熙九年一甲三名進士，授編修。十一年，主順天鄉試，拔韓荃於遺卷中。明年，魁天下，文體一變。十四年，遷左贊善。丁母艱，喪葬一以禮。爲讀禮通考百二十卷。起充明史總裁官，累擢內閣學士，充會典、一統志副總裁。二十六年，遷左都御史。擢刑部尚書。乞罷，卒。

轉蓬枯質自來輕〔二〕，繞樹孤棲尙未成〔三〕。守兔江湄遲夜月〔四〕，飲牛澗底觸秋聲〔五〕。孤

單苦憶難兄弟〔五〕，薄劣煩呼似舅甥〔六〕。今日燕臺何邂逅〔七〕？數年心事一班荆〔八〕。

【彙校】

〔煩呼〕徐注本，吳、汪、曹三校本「煩」作「頻」。

【彙注】

〔一〕轉蓬 徐注：曹植雜詩：轉蓬離本根。

〔二〕繞樹句 遼案：上年至昌黎、昌平，返山東。復南歸，次揚州。旋又北去至天津。今年二月，

復至昌平。六月，返山東。棲遑無定所。故詩云云。

〔三〕守兔句 原注：鮑照擬古詩：南國有儒生，迷方獨淪誤。伐木清江湄，設置守兔兔。

遼案：後漢書章帝紀：朕思遲直士。王先謙集解：何若瑤曰：遲，待也。

〔四〕飲牛句 徐注：高士傳：堯又召許由爲九州長，由不欲聞之，洗耳於潁水濱。巢父牽犢欲飲，見

由洗耳，問其故。語之。巢父曰：汚吾犢口。牽犢上流飲之。

〔五〕孤單句 徐注：南齊書孝義傳：同里陳穰，孤單無親戚。世說：陳太丘曰：元方難爲兄，季方難

爲弟。

遼案：清史稿徐元文傳：與兄乾學、弟秉義有聲於時，稱爲「三徐」。元文，字公肅，舉順治十六年進士第一。康熙二十八年，拜文華殿大學士。兄乾學豪放，頗招權利；而元文謹禮法，門庭肅然。秉義，字彥和，舉康熙十二年進士第三。累遷內閣學士。全祖望先生神道表：徐尙書

乾學兄弟，甥也。當其未遇，先生振其乏。案：徐譜：崇禎六年，甥徐秉義生。七年，元文生。則秉義兄而元文弟，清史稿疑誤。

〔六〕薄劣句 蘧常案：謝靈運九日從宋公戲馬臺集送孔令詩：彼美丘園道，喟焉傷薄劣。太平御覽卷一百二十八徐爰宋書曰：何無忌，劉牢之甥，酷似其舅。

〔七〕今日句 徐注：上谷郡圖經：黃金臺在易水東南十八里，燕昭王置千金於臺上，以延天下之士。水經注：固安縣有黃金臺。郡國利病書：今都城東南十六里有黃金臺，後人僞爲耳。

蘧常案：李白江上奉答崔宣城詩：謬忝燕臺召，而陪郭隗蹤。

〔八〕班荆 蘧常案：見卷三酬歸祚明戴笠王仍潘樞章四子韭溪草堂聯句見懷二十韻詩「班荆」注。

## 天津

### 【解題】

徐注：方輿紀要：天津衛西北至順天府二百七十里，水行四百里。城周九里，北瀕衛河，東繞潞河，漕舟悉出於此。

文皇都北平〔一〕，始建天津衛〔二〕。內以輔神京，外徹溟海際〔三〕。南北瀉兩河，吐納百川細〔四〕。輒漕日夜來，貢賦無留滯〔五〕。重臣鎮其間，鼎足分宣薊。豈惟念輸將，隱然存大

計〔七〕。孽盜踵集〔七〕，共主非幽厲〔八〕。曾無一矢遺〔九〕，歟啓都城閉〔一〇〕。馬嵬止玄宗〔一一〕，曹陽宿獻帝〔一二〕。雖云兩日程，乘輿豈能詣〔一三〕？先帝一出宮，洞然知國勢。與其蹈危塗，不若宮中縊〔一四〕。嗚呼事一乖，宇宙遂顛蹶。開府固庸才，奉頭竟南逝〔一五〕。巡撫馮元龍修言曲突謀，縱有亦奚濟〔一六〕？何人爲史官？直筆掃蕪翳。登陴望九門〔一七〕，臨風灑哀涕。

【彙校】

【題】此首與下舊滄州兩詩，潘刻本、徐注本列在再謁天壽山十三陵詩前。

【彙注】

〔一〕文皇句 蘧常案：明史成祖本紀三：永樂二十二年七月崩。九月，上尊諡曰體天弘道高明廣運聖武神功純仁至孝文皇帝。又志地理一：順天府，洪武元年八月改爲北平府，十月，屬山東行省。二年三月，改屬北平。永樂元年正月，升爲北京。

〔二〕始建句 徐注：方輿紀要：永樂二年，築城置戍。三年，調天津衛及天津左衛治焉。四年，復調天津右衛駐焉。初設備兵使者於此。

蘧常案：明史志地理一：河間府靜海注：北有天津衛，永樂二年十一月置。

〔三〕內以二句 徐注：方輿紀要：元行海運，以天津海道爲咽喉要道。志云：天津一隅，東南漕舶，鱗集其下。去海不過百里，風帆馳驟，遠自閩、浙，近自登、遼，皆旬日可達。控扼襟要，誠京師第一

形勝處也。

〔四〕南北二句 徐注：方輿紀要：靜海縣小直沽，其北則北河，受北路之水；其南則衛河，合南路之水，皆會於此，同流入海，天津衛設焉，爲京師東面襟喉之地。

〔五〕輓漕二句 徐注：明史志食貨三：漕運自成祖遷燕，道里遼遠，法凡三變。初支運，次支運兌運相參，至支運悉變爲長運而制定。又：淮、徐、臨、德各有倉。江西、湖廣、浙江民運糧至淮安倉，分遣官軍就近輓運。自淮至徐以浙、直軍；自徐至德以京衛軍；自德至通以山東、河南軍。以次遞運，歲凡四次，可三百萬餘石，名曰支運。由是海陸兩運皆罷，惟存遮洋船。每歲於河南、山東、小灘等水次兌糧三十萬石，十二輪天津，十八由直沽入海輸薊州。

蓮常案：說文解字：漕，水轉穀也。

〔六〕重臣四句 徐注：明史志職官二：成化二年專設都御史贊理軍務，巡撫順天、永平、河間等處。先是，薊、遼有警，間遣重臣巡視，或稱提督；至是，以邊患益甚，始置總督，開府密雲，轄順天、保定、遼東三巡撫。方輿紀要：天津衛，其後遼左多事，增置重臣，已列將領，爲京師東南之巨鎮。又明史：天津巡撫，萬曆二十五年以倭寇陷朝鮮設。漢書：錯傳：屯戍之事益省，轉將之費益寡。

蓮常案：明史志兵三：初設遼東、宣府、大同、延綏四鎮，繼設寧夏、甘肅、薊州三鎮。案：宣薊，謂宣府、薊州兩鎮也。

〔七〕巢芝 徐注：唐書黃巢傳：黃巢，曹州人。世鬻鹽，富於貲，善擊劍騎射。乾符二年，濮州賊王仙芝亂長垣，有衆三千。先有謠曰：金色蝦蟆爭努眼，翻却曹州天下反。及仙芝盜起，巢與羣從八人，募衆應之。仙芝敗，推巢爲主，號衝天大將軍，陷京師，僭位。號大齊，改元金統。

〔八〕共主句

徐注：孟子：名之曰幽厲。

遼常案：永昌詔亦云「君非甚暗」，見卷一大行皇帝哀詩「人多」句注。

〔九〕曾無句 徐注：左傳成公十二年：無亦唯是一矢以相加遺。

〔一〇〕歎啓句 遼常案：小腆紀年：崇禎十七年三月乙巳，闖圍京師。丙午申刻，彰義門忽啓，蓋太監曹化淳獻城也。賊大衆馳入，官軍鳥獸散焉。北略：彰義門忽啓，德勝、平則二門亦隨破，或云王相堯等內應也。

〔一一〕馬嵬句 遼常案：陝西通志：馬嵬，在西安與平縣西二十五里。舊唐書楊貴妃傳：安祿山叛，潼關失守，從幸至馬嵬。禁軍大將軍陳玄禮密啓太子誅國忠父子。既而四軍不散，玄宗遣力士宣問，對曰：賊本尙在。蓋指貴妃也。帝不獲已，與妃詔，遂縊死。

〔一二〕曹陽句 徐注：後漢書獻帝紀：興平二年十一月庚午，李傕、郭汜等追乘輿，戰於東澗，王師敗績。壬申，幸曹陽，露次田中。注：曹陽，澗名，今在陝州西南七里，俗謂之七里澗。又郡國志：弘農郡弘農縣有曹陽亭，曹操改曰子陽澗。

〔一三〕雖云二句 遼常案：此二句，當爲馮元覽請崇禎南遷之說而發。「兩日程」，謂北京至天津也。其

說見黃宗義巡撫天津右僉都御史留仙馮公神道碑銘：當是時，慈谿馮公留仙巡撫天津。先是，崇禎十六年冬十月，公密陳南北機宜，謂道路將梗，當疏通海道，防患於未然。天子俞之。公乃具海舟二百艘，以備緩急。明年三月，使其子愷章入迎天子，奏曰：京師戎政久虛，以戰以守，無一可恃。臣督勁旅五千，馳赴通郊，躬候聖駕航海行幸留都。初七日，愷章至京師，見張公國維。張公曰：寇深矣，是請也，不可緩。倪公元璐曰：皇上有國君死社稷之言，羣臣無以難也。方公岳貢，范公景文曰：曩者津門餉匱，公要蘇州之運以給之，天子方怒。疏上且死。愷章徬徨七日，不得要領，歸報於公，未四日而京師陷。

(四)

先帝四句 徐注：烈皇小識：耐馬鞏永固面奏：賊勢猖獗，官兵畏賊如虎。祈簡才望大臣，重守都城。聖駕南巡，徵兵親討。臣號召京畿義勇，可得十萬衆，扈從起行。上意不決。諸臣言其誕妄，議守九門。十五夜，上復召永固問以前策。對曰：賊前尙遠，人皆畏賊，六龍南幸，從者必多；今者已逼近，人心瓦解，臣不誤陛下也。上領之。十八夜，上微服雜內奄出東華門。至朝陽門，訛言王太監奉旨出城。守者請以天明請驗。扈從者奪門，守者反蔽擊之，不得出。朝陽係朱純臣所守，急詣純臣第。閹人辭以赴宴未回。上歎息而起，走安定門，門閹堅不可舉，乃返厚載門。是夜，方岳貢直宿精微科。四鼓，內侍傳諭諸先生速赴行在，聖上已同驍騎馬、王太監出宮矣。明史吳甘來傳：有言駕南幸者，甘來曰：主上明決，必不輕出。又史直傳：有傳帝南狩者，直將往從；見賊騎塞道，出門輒返。曰：四方兵戈，駕焉往？

遼常案：宮中綰，見卷一大行皇帝哀詩題注。

(四) 開府二句 徐注：明史馮元勵傳附元勵：元勵，字爾廣，崇禎元年進士。累遷福建提學副使，獲譴，謫山東。十一年，濟南被兵，攝濟寧兵備事。十四年十月，擢右僉都御史，代李繼貞巡撫天津，兼督遼餉。時元勵已掌中樞。帝顧其兄弟厚，嘗賜宮參療元勵疾，而元勵以衰老乞休。詔遣李希沅代，未至而京城陷。元勵乃由海道脫歸。

遼常案：奉頭，見卷三山海關詩「廣寧」三句注。

(五) 修言二句 徐注：漢書霍光傳：客有過主人者，見其竈直突，旁有積薪。客謂主人更爲曲突，遠徙其薪，不者，且有火患。俄而家果失火。救之幸息。於是殺牛置酒，灼爛者在上行，不言曲突者。人謂主人曰：鄉使聽客之言，不費牛酒，終無火患。今論功而請賞，曲突徙薪無恩澤，焦頭爛額爲上客耶？全云：意指梨洲津撫志銘之非。

遼常案：黃宗羲巡撫天津右僉都御史留仙馮公神道碑銘：銘曰：當國危言，曰守曰避，擇斯二者，視其形勢。唐避再興，宋守不墜，未嘗執一，以爲正義。奈何小儒，今古不備，伯紀（案：李綱字）一言，遂同成議。南遷之論，其時有二，在外惟公，在內惟李（原注：邦華）。舉朝不然，至委神器，當日陪京，原有深意。公言若行，天威尙厲，官守奔問，山河位置。幸災樂禍，何所施計？吁嗟馮公，此願不遂。蹈海南還，一丘貉睡，鐘鼓無靈，灰釘見志。案：當時頗疑元勵以請南幸未上之疏飾其棄鎮逃歸之罪，故詩以爲卽有此謀，亦無濟於實事也。又，「原注邦華」四字，或係

誤入。蓋爭南幸者爲李明睿（字太虛，時官中允），而邦華則請帝固守京師，以太子監國留都。吳偉業壽座主李太虛詩「江湖有夢爭南幸，遼海無家紀北歸」，卽指其事。

〔七〕登陣句 徐注：嘉話錄：張巡守睢陽，激厲將士，賦詩曰：裹瘡猶出陣，飲血尙登陣。

遼常案：九門，見卷二淮東詩「長安」句注。

## 舊滄洲

### 【解題】

徐注：明史志地理：河間府滄州，洪武初以州清池縣省入。注：舊治在東南。洪武二年五月，徙於長蘆，卽今治也。東濱海，西有衛河，南有浮河，北有長蘆巡檢司。

落日空城內，停驂問路歧〔一〕。曾經看百戰〔二〕，唯有一狡狴〔三〕。

### 【彙校】

〔題〕徐注本，吳、汪、曹三校本「洲」作「州」。丕續案：作「州」是。

### 【彙注】

〔一〕停驂 遼常案：見前卷三薊州詩「停驂」注。

〔二〕曾經句 徐注：方輿紀要：秦屬鉅鹿，漢置渤海郡。燕、齊有事，必先爭渤海，地理然也。朱全忠屢攻滄州而未能有，石晉以瀛、莫入契丹而滄州之患益亟。周世宗雖復關南，以州境據河濱海，

北望遼、碣，列營戍守。宋承其轍。蒙古取燕，先殘滄、景。及山東羣盜共起亡元，陷清、滄，據長蘆，郊圻皆戰地矣。

〔三〕

狡狴 徐注：爾雅：狡狴，狀如彪貓，食虎豹。郭璞注：卽獅子也。一統志：開元寺在舊滄州城內，有鐵獅子高一丈七尺，長六尺。相傳周世宗時，有罪人鑄以贖罪，今寺廢，獅亦殘缺。

白下

【解題】

徐注：江寧府志：白下縣城卽南琅瑯郡，古白石壘。唐書地理志：武德元年，罷金陵縣，築此城，因其舊名曰白下縣。

白下西風落葉侵，重來此地一登臨。清笳皓月秋依壘，野燒寒星夜出林。萬古河山應有主，頻年戈甲苦相尋。從教一掬新亭淚，江水平添十丈深。

【彙校】

此首常熟瞿氏鐵琴銅劍樓藏蔣山傭詩集本與各本全異，錄之如次：白下西風木葉多，重來舊館一經過。氍毹水上依搖櫓，烽火山頭出負戈。月逗隱磯驚鶴雀，雲迷絕島失鼉鼉。登樓卽有清笳韻，獨夜何人與嘯歌？